



Broj: 2-114/11 Sarajevo, 20.08.2011. godine

UPRAVNOM ODBORU UDRUŽENJA „OBRAZOVANJE GRADI BiH“

Informacija o zimovanju i ljetovanju u 2011. godini

U cilju ostvarenja kontinuiteta značajne programske aktivnosti u kojoj su učestvovali članovi Udruženja, nevladine organizacije i ustanove koje brinu o socijalnim potrebama građana BiH, u 2011. godini realizovana su slijedeća zimovanja i ljetovanja:

1. Zimovanje, po pozivu skijaškog kluba Alpen Ski Sarajevo 84 kojeg sačinjavaju članovi bh. dijaspore u Skandinaviji, u skijaškom centru Klappen, Švedska realizirano je sa 8 učesnika iz Udruženja u trajanju 10 dana, januara 2011. godine. Tokom zimovanja s učesnicima su realizirani obuka u skijanju, rekreativni i zabavni sadržaji, kao i posjeta Udruženju „Miris“ Orebro i Muzeju Alfred Nobel. Troškovi zimovanja u iznosu 12.000 KM podmireni su sredstvima Alpen Ski Sarajevo 84 i učešćem Udruženja za troškove avio prijevoza u iznosu od 6.500 KM.

2. Po pozivu Comité catholique contre la Faim et pour le développement, Pariz (Francuska), od 18. do 25.04.2011. godine na skupu 3.500 skauta/izviđača iz cijelog svijeta učestvovala je stipendistica Udruženja. Troškovi učešća u procijenjenom iznosu od 3.000 KM podmireni su sredstvima organizatora.

3. Na Festivalu Dani Sarajeva u Beogradu, po pozivu Inicijative mladih za ljudska prava učestvovala su 3 člana Udruženja, maja 2011. godine, u trajanju od 5 dana. Program Festivala obuhvatio je kulturno-umjetničko predstavljanje Bosne i Hercegovine uz dijalog o aktuelnim temama iz oblasti djelovanja nevladinog sektora u cilju unaprijeđenja odnosa Republike Srbije i Bosne i Hercegovine. Troškovi boravka u Beogradu u iznosu 2.500 KM podmireni su sredstvima organizatora.

4. Ljetovanje na Boračkom jezeru, u partnerstvu s Odredom izviđača „Neretva“ Konjic, realizovano je sa 250 učesnika iz Sarajeva, Bakovića, Visokog, Kalesije, Ilidže, Križevića-Zvornik, Fojnice, Novog Travnika i Konjica, jula 2011. godine. Tokom ljetovanja realizirani su edukativni, sportsko-rekreativni i zabavni sadržaji i na primjeren način obilježen je 11. juli – Evropski dan sjećanja na genocid u Srebrenici. Podatak da su učesnici ljetovanja iz Udruženja „Obrazovanje gradi BiH“ bili zastupljeni sa oko 30 % ukazuje na nedovoljan interes stipendista za ljetovanje na Boračkom jezeru.

Inače, pored nedovoljne zainteresiranosti za ljetovanje na Boračkom jezeru, ponašanje članova Udruženja u pogledu discipline nije bilo na nivou renomea Udruženja radi čega je načelnik Štaba ljetovanja izrekao disciplinsku mjeru. Troškovi ljetovanja u iznosu 28.176 KM podmireni su donatorskim i sredstvima Udruženja.

5. Ljetovanje u Grenoblu, Francuska, sa 13 učesnika u trajanju 8 dana, avgusta 2011. godine, u organizaciji Asocijacije Emmaus iz Grenobla. Realizacijom programa ljetovanja učesnici su posjetili nekoliko gradova uz obilazak kulturno-historijskih spomenika upoznali su specifičnost organiziranosti i djelovanja Asocijacije Emmaus. Troškovi ljetovanja u iznosu 21.000 KM izmireni su sredstvima Asocijacije Emmaus iz Grenobla i Udruženja.

Zaključak

Na zimovanju i ljetovanju učestvovalo je ukupno 275-ero djece i mladih, članova Udruženja, romskih organizacija, organizacija i ustanova koji brinu o djeci i mladim s posebnim potrebama, članovima udruženja porodica šehida i poginulih boraca i Odreda izviđača „Neretva“ Konjic.

Zimovanje i ljetovanja realizirani su u januaru, aprilu, julu i avgustu u ukupnom trajanju od 44 dana.

Planski rad i razne aktivnosti tokom zimovanja i ljetovanja kod učesnika su doprinijeli razvijanju prijateljstva, smisla za kolektivni život i rad, vjerskoj i etničkoj toleranciji, pozitivnim moralnim osobinama i



stjecanju novih poznanstava, korisnih znanja i vještina, i jačanju ugleda Udruženja u Bosni i Hercegovini i inozemstvu.

U funkciji vođa grupa, s gledišta brige za zdravlje, sigurnost, disciplinu i ostvarivanje ciljeva ljetovanja na Boračkom jezeru, za razliku od drugih učesničkih grupa, stipendisti Udruženja nisu pokazali zahtijevani nivo odgovornosti. Pozitivne ocjene zaslužili su vođe grupa na Festivalu Dani Sarajeva u Beogradu i ljetovanju u Grenoblu, Francuska.

Istovremeno su, u funkciji edukatora Sanja Pačo i Irnis Delija opravdali povjerenje u realizaciji edukativnog dijela programa ljetovanja. Posebno je Safija Zahirović, dipl. sociolog, nakon obavljanja pripravničkog staža u 2011. godini u Udruženju, uložila poštovanja vrijedan napor u ostvarenju edukativnog dijela programa ljetovanja. U cjelini, zimovanje i ljetovanja mogu se ocijeniti uspješnim, ali uz napomenu da je u narednom periodu realizacije ovih aktivnosti neophodan selektivan pristup u izboru vođa grupa Udruženja „Obrazovanje gradi BiH“ i romskih organizacija, isključujući Omladninsku romsku organizaciju „Budi mi prijatelj“ Visoko.

Ukupni troškovi zimovanja i ljetovanja u iznosu 66.676 KM podmireni su novčanim i robnim donacijama nevladinog, poslovnog i vladinog sektora iz BiH i inozemstva i participacijom organizacija za ljetovanje na Boračkom jezeru, uključujući Udruženje „Obrazovanje gradi BiH“.

Izveštaj sačinio
Mehmed Agić